



## Fichas divulgativas pagamentos directos

## FICHA 2f / DP

## Transferencia de dereitos

### NORMATIVA

- **Regulamento (CE) 1307/2013** polo que se establecen normas aplicables aos **pagamentos directos** aos agricultores en virtude dos réximes de axuda incluídos no marco da política agrícola común (título III, capítulo 1, sección 3, artigo 34).
- **Real decreto 1075/2014** sobre a aplicación a partir de 2015 dos **pagamentos directos** á agricultura e á gandaría e outros réximes de axuda, así como sobre a xestión e o control dos pagamentos directos e dos pagamentos ao desenvolvemento rural.
- **Real decreto 1076/2014** sobre **asignación de dereitos** de réxime de pagamento básico da política agrícola común (capítulo III, art. 28 ao 31).

### DEFINICIÓNS RELACIONADAS

**Agricultor:** toda persoa física ou xurídica cuxa explotación estea situada en España e que exerza unha actividade agraria.

**Explotación:** todas as unidades de produción utilizadas por un/unha agricultor/a e situadas no territorio de España.

**Actividade agraria:**

- A produción, a cría ou o cultivo de produtos agrarios, con inclusión da colleita, da muxidura, da cría de animais e do mantemento de animais para efectos agrícolas.
- O mantemento dunha superficie agraria nun estado adecuado para pasto ou cultivo sen ningunha acción preparatoria que vaia máis alá dos métodos e da maquinaria agrícola habituais.

**Autoridade competente:** o órgano competente da comunidade autónoma a que debe dirixirse a solicitude única. Esa comunidade autónoma será aquela en que radique a explotación ou a maior parte da súa superficie agraria e, en caso de non dispor de superficie agraria, onde se encontre o maior número de animais.

**Venda:** a transmisión definitiva da propiedade da terra ou dos dereitos de pagamento básico. A definición non inclúe a venda de terras cando estas se cedan ás autoridades públicas ou para uso de interese público e cando a cesión se realice con fins non agrícolas.

**Arrendamento:** a transmisión temporal do aproveitamento de terras ou dos dereitos de pagamento básico.

**Cesión:** o arrendamento ou a venda ou sucesión *inter vivos* ou *mortis causa* de terras ou dereitos de pagamento básico ou calquera outra cesión definitiva deles; non inclúe a restitución de dereitos ao expirar un arrendamento.

**Regulamento (CE) 1307/2013 de pagamentos directos (artigo 4)**  
**Real decreto 1075/2014 de pagamentos directos (artigo 3)**



## NORMAS XERAIS

Os dereitos de pagamento básico só poderán ser cedidos dentro da mesma rexión do réxime de pagamento básico onde eses dereitos fosen asignados, ben por venda, arrendamento ou mediante calquera outra forma admitida en dereito.

Tanto a venda como o arrendamento dos dereitos poderán ser realizados con ou sen terras.

Os dereitos de pagamento básico só se poderán transferir a un/unha agricultor/a con dereito a recibir pagamentos directos, é dicir, a agricultores que cumpran a condición de agricultor activo, excepto no caso das herdanzas.

Poderanse ceder voluntariamente á reserva nacional todos os dereitos de axuda que non se vaian utilizar.

**Real decreto 1076/2014 sobre asignación de dereitos (art. 28)**

## TIPOS DE TRANSFERENCIAS E RETENCIÓNS APLICABLES

**Transferencias de dereitos sen terras:** restituírase á reserva nacional o 20 % do valor de cada dereito, excepto no caso de que se trate de cesións realizadas por produtores cuxo importe total de dereitos de pagamento básico sexa inferior a 300 €.

**Transferencias de dereitos con terras:** neste caso non se aplicará retención.

Tampouco se aplicarán retencións nos seguintes supostos:

- a) En caso de venda ou cesión definitiva dos dereitos de axuda con ou sen terras a un/unha agricultor/a que inicia a actividade agraria.
- b) Nos casos de substitución do titular como motivo de:
  - herdanzas
  - xubilacións en que o cesionario dos dereitos sexa un familiar de primeiro grao do cedente
  - programas aprobados de cesamento anticipado
  - incapacidade laboral permanente
  - cambios do estatuto xurídico da explotación
  - agrupacións de varias persoas físicas ou xurídicas noutra persoa xurídica ou ente sen personalidade xurídica
  - escisións de persoas xurídicas ou de agrupacións de persoas físicas
  - cambios de titularidade derivados da inscrición dunha explotación no rexistro de explotacións de titularidade compartida, sempre que o titular previo siga formando parte desa explotación.

Todas estas circunstancias deberán ser probadas mediante documentos públicos ou privados liquidados de impostos.

## COMUNICACIÓN DAS TRANSFERENCIAS

As transferencias poderanse realizar en calquera momento do ano.

O cedente comunicará a cesión dos dereitos de axuda á autoridade competente ante a cal presentase a súa última solicitude única.

O período de comunicación iniciarase o 1 de novembro e finalizará cando remate o prazo de presentación da solicitude única do seguinte ano.

Entenderase que a transferencia foi aceptada se, aos seis meses desde a comunicación, a autoridade competente non notificou motivadamente a súa oposición.